



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
14 Dezembru 2024

Xefe Suku Cairui husu ba JSMP atu kontinua halo treinamentu ba to’o iha nível aldeia

Iha 11 Dezembru 2024, JSMP fahe informasaun ba membru konsellu suku nomós membru comunidade sira iha suku Cairui, Postu Administrativu Laleia, Munisípiu Manatutu.

Matéria treinamentu kona-ba prosesu legál, kna’ar autór judisiáriu sira, direitu labarik, prevensaun violénsia bazeia ba jéneru (VBJ) no serbisu rede referral nian.

Objetivu hosi treinamentu ida-ne’e mak atu hasa’e koñesimentu membru konsellu suku no comunidade sira nian kona-ba saida mak krime, tipu krime, oinsa prosesu kazu violénsia bazeia ba jéneru (VBJ), serbisu Polísia, Ministériu Públiku, Defensór Públiku/Advogadu Privadu, no direitu sira labarik nian tuir enkuadramentu legál sira Timor-Leste nian.

Treinamentu ne’e realiza iha suku refere bazeia ba pedidu xefe suku nian katak sira nia suku remota loos no do’ok hosi sidade inklui konsellu suku foun hotu no ladún asesu ba informasaun relevane sira.

“Informasaun sira ne’ebé JSMP fahe ba membru Konsellu Suku no membru comunidade sira Suku Cairui importante no relevante tebes ba sira nia knaar no responsabilidade hodi rezolve sira ne’ebé kabe ba sira nia kompeténsia no kanaliza problema sira ne’ebé la kompete ba sira ba autoridade competente sira hodi rezolve nomós oinsa bele kontribui ba hodi asegura no promove direitu sira labarik nian iha sira nia suku, “ dehan Sr. Casmiro dos Santos, Diretor Ezekutivu Interinu JSMP.

Xefe Suku Cairui iha nia intervensaun, haktuir katak durante ninia mandatu ho estrutura foun foin primeivés hetan treinamentu hosi JSMP kona-ba asesu justisa formál, *“durante ne’e ami la iha koñesimentu oinsa prosesu kazu tuir prosesu legál hanesan kazu abandona labarik sira iha suku Cairui, kazu violénsia doméstika inklui kazu sira ne’ebe mak autridade suku rezolve tuir ninia kompeténsia”.*

Xefe suku hato’o agradesimentu wa’in ba JSMP tanba bele fasilita treinamentu ba nia estrutura konsellu suku foun. Xefe suku husu ba partisipante katak informasaun labele para iha partisipante de’it maibé sei transmite fali ba comunidade sira hotu. Xefe suku informa mós ba partisipante sira hanesan xefe aldeia ho ninia delegadu/a atu

organiza ida-idak nia comunidade atu fahe informasaun sira iha treinamentu tuir manuál ne'ebé JSMP fahe ona ba ba sira. Xefe suku informa tan katak sei observa xefe aldeia sira hotu ninia atividade liu-liu fahe tutan JSMP nia informasaun ne'e ba comunidade/aldeia tuir Xefe suku nia moto (prinsípiu) katak *“hau nia povu lakohi ki'ak ba informasaun maibé riku ba informasaun durante hau nia mandatu nu'udar Xefe suku”*. Xefe suku husu ba JSMP atu kontinua treinamentu ne'e to'o iha nível aldeia.

Iha treinamentu refere partisipante husu pergunta katak ami rua hau nia la'en problema no hau nia la'en baku hau iha uma laran depois hau nia banin sai hosi ninia uma laran mós mai baku hau ne'e oinsa ninia prosesu? JSMP esplika katak ita nia la'en baku ita ne'e krime violénsia doméstika ho natureza krime públiku tuir lei Nu.7/2010 LKVD no bele hato'o keixa ba iha polisia ka Ministériu Públiku hodi prosesa tuir justisa formál no labele rezolve iha nivel suku. Kona-ba ita nia banin baku ita ne'e konforme nia todan ka gravidade, bainhira ladún todan ka grave, entaun tama iha kategoria krime ofensa ba integridade fizika simples ho natureza semi-públiku no se todan ka grave tama iha kategoria krime ofensa ba integridade fizika grave ho natureza krime públika. Kazu ne'e la tama ba krime violénsia doméstika tanba la hela hamutuk iha uma ida no la dependénsia ekonómika ba malu.

Partisipante sira kompostu hosi Xefe Suku, lia na'in suku, representante joven suku, Xefe aldeia, delegadu/a, lia na'in aldeia nomós membru comunidade sira. Totál partisipante sira hamutuk na'in 30 ne'ebé kompostu hosi mane 18 no feto 12.

Treinamentu ne'e realiza hosi JSMP ho apoiu finanseiru hosi USAID/Timor-Leste Advocacy Activity for Good Governance.

Atu hetan informasaun kompletu favor kontaktu:

Casimiro dos Santos

Diretor Ezekutivu Interinu JSMP

Diresaun e-mail: casimiro@jsmp.tl

Telefone: (+670) 33238883 | 77257466

Website: <https://jsmp.tl>

info@jsmp.tl